

18 AUG, 2022

Kelangsungan pelaburan cukai demi kemakmuran negara

Berita Harian, Malaysia

Page 1 of 2

Kelangsungan pelaburan cukai demi kemakmuran negara

HASiL berjaya laksana fungsi sebagai lembaga pengantara tingkat kutipan



Oleh Dr Mohd Noor Yazid

Bekas Pensyarah dan Profesor Madya di Program Hubungan Antarabangsa, Fakulti Sains Sosial dan Kemanusiaan, Universiti Malaysia Sabah

Lembaga Hasil Dalam Negeri Malaysia (HASiL), pembayar cukai dan pendapatan negara mempunyai hubungan rapat dengan pembangunan serta kementerian ekonomi negara. Peranan penting yang dimainkan oleh HASiL sebagai agensi utama di bawah

Kementerian Kewangan memang tidak dapat dinafikan dalam memungut dan mentadbir cukai langsung negara.

Hasil cukai menyumbang peratusan besar kepada pendapatan negara setiap tahun sama ada daripada cukai langsung mahu pun tidak langsung.

Tanpa pendapatan daripada cukai, adalah mustahil negara mendapat dana mencukupi bagi menampung perbelanjaan pembangunan dan pengurusan.

Persoalannya, adakah pembayar cukai boleh dianggap sebagai 'pelabur' kepada syarikat yang bergelar Malaysia? Pernyataan dan pengertian mudah ialah 'pelabur' akan membawa keuntungan kepada kedua-dua pihak.

Adakah pembayar cukai dianggap pelabur kepada negara Malaysia? Siapakah lembaga atau

institusi yang menjadi pengantara antara pembayar cukai dan negara?

Bagaimanakah cukai boleh dikutip dan pengurusan yang berkaitan boleh dilakukan dengan sistematik? Bagaimana pula agihan yang sah boleh dilakukan dan memberi keyakinan kepada pembayar cukai?

Kutipan dilabur semula

Apa yang lebih penting ialah hasil dikutip itu dapat diguna atau dilaburkan semula ke dalam negara agar berlaku kitaran dan pelaburan positif berterusan.


Dengan itu, pembangunan dan pentadbiran negara berlaku dengan sempurna serta memastikan proses pembangunan dan kegiatan ekonomi terus berjalan.

Tanpa kegiatan ekonomi yang lancar, aktif, tersusun dan sistematik, cukai tidak mungkin dapat dikutip dengan baik sehingga membolehkan jumlah kutipan mencukupi bagi putaran kegiatan ekonomi yang sempurna.

Satu persoalan mudah; mungkinkah kegiatan ekonomi dapat berjalan lancar tanpa prasarana yang baik dan struktur politik dan pentadbiran yang sempurna serta stabil?

Mungkinkah tanpa jumlah peruntukan belanjawan mencukupi dapat menyediakan peruntukan perbelanjaan pembangunan ekonomi, sosial, keselamatan serta kesihatan yang baik?

Semuanya tidak mungkin berlaku tanpa peruntukan belanjawan mencukupi. Dari mana sumber belanjawan negara bagi perancangan setiap tahun jika bu-



kan daripada sumber cukai.

Di sini, jelas terbukti peranan yang dimainkan HASiL sebagai lembaga yang mengutip dan menguruskan pungutan cukai. Tanpa lembaga seperti HASiL yang mengutip cukai secara sistematik, tidak mungkin cukai dapat dikutip dalam jumlah yang begitu besar.

Dengan kata lain, tanpa pungutan cukai, negara tidak akan mendapat sumber mencukupi ba-

gi menampung perbelanjaan kerana cukai adalah sumber terpenting bagi pendapatan negara.

Hasil pendapatan negara

Ini dapat dijelaskan melalui kedudukan sumber cukai dan buana cukai dalam komponen pendapatan negara serta belanjawan negara mulai 2019 hingga 2022:

Merujuk Belanjawan Kerajaan Persekutuan bagi 2019 hingga 2022, sumber daripada cukai adalah lebih besar berbanding sumber bukan cukai.

Sumber cukai ini merujuk cukai pendapatan, lain-lain cukai langsung dan cukai tidak langsung, manakala sumber bukan cukai merujuk kepada pinjaman dan penggunaan aset kerajaan serta hasil bukan cukai.

Ini menunjukkan, peratusan hasil cukai melebihi hasil bukan cukai iaitu 56 peratus (2019), 63.9 peratus (2020), 54.1 peratus (2021) dan 51.6 peratus (2022).

Daripada angka ditunjukkan, jelas kepada kita pendapatan daripada sumber cukai menyumbang peratusan besar bagi pendapatan negara.

Jika HASiL tidak memainkan peranan penting dalam memastikan peratusan pendapatan cukai yang besar ini, tentu belanjawan yang dirancang menghadapi kesulitan dan kepincangan. Dari mana hasil cukai besar ini diperoleh jika bukan sumbangan semua pembayar cukai.

Pendapatan negara hasil dari-

pada cukai ini diguna untuk pembangunan negara dan kesejahteraan rakyat. Dapat kita katakan pembayar cukai ialah pelabur kepada Malaysia.

Mereka yang layak membayar harus menyedari hakikat bahawa cukai dikutip bagi kebaikan kita semua, iaitu bagi pembangunan negara secara keseluruhan yang dinikmati bersama.

Tanpa pendapatan negara yang mencukupi, proses pembangunan tidak akan berjalan dengan sempurna. Secara tidak langsung, pulangan semula atau kesan positif pelaburan negara bersifat jangka panjang tidak akan berlaku tanpa pungutan cukai yang mencukupi.


Seharusnya, rakyat terutamanya pembayar cukai memahami fungsi HASiL sebagai agensi utama di bawah Kementerian Kewangan yang dipertanggungjawabkan mengutip dan mentadbir cukai langsung negara.

Oleh itu, pentadbiran dan kuasa politik yang berkuasa perlu menggunakan dan membelanjakan pendapatan negara (yang besar peratusnya daripada sumber cukai) dengan sebaik mungkin.

Elak sebarang salah guna sumber yang ada dan laksanakan amanah dengan penuh integriti.

Elakkan ketirisan sumber kerana ia akan memberikan kesan negatif kepada semua pembayar cukai serta pusingan positif pelaburan jangka panjang Malaysia.





18 AUG, 2022

Kelangsungan pelaburan cukai demi kemakmuran negara

Berita Harian, Malaysia

Page 2 of 2

SUMMARIES

HASiL berjaya laksana fungsi sebagai lembaga pengantara tingkat kutipan

Lembaga Hasil Dalam Negeri Malaysia (HASiL), pembayar cukai dan pendapatan negara mempunyai hubungan rapat dengan pembangunan serta kemantapan ekonomi negara. Peranan penting yang dimainkan oleh HASiL sebagai antara agensi utama di bawah Kementerian Kewangan memang tidak dapat dinafikan dalam memungut dan mentadbir cukai langsung negara.